

## حضرت عیسیٰ نا ڈوئی واری زندہ ہوئی جاٹا

24<sup>1</sup> ہفتے نا دیہاڑا گزریا، تے ایتوارے نی صُبح  
نور پیر نے ویلے اُنہاں جناٹیاں اپنی تیار کیتیاں

ویاں چیزاں قبرے اپر کھڑیاں۔<sup>2</sup> قبر اپر جائی کرے اُنہاں  
تکیا کہ قبر نے مونہے اپر رَخیا وا پتھر کُسے روڑھیا وا سی۔

<sup>3</sup> جیہڑے ویلے او اندر گئیاں، تے تکیا کہ حضرت عیسیٰ  
نی میّت مبارک قبر وِچ نی سی۔<sup>4</sup> اے گل تکی کرے او

حیران ہوئی گئیاں۔ فر اچانک دو بندے جنہاں نا لباس چٹّا  
دُدھ سی، آئی گئے۔<sup>5</sup> جناٹیاں ڈرے نال اپٹیاں نظراں تھلے

کری کہندیاں۔ تے فر اُنہاں بندیاں آخیا، ”تُساں جیٹے کی  
مویاں وِچ کیئاں لوڑٹیاں او؟<sup>6</sup> او اِتھے نی، بلکہ زندہ ہوئی

گیا اے! یاد کرو اُس ریاست گلیل وِچ تُساں کی آخیا سی،  
<sup>7</sup> اے گل لازمی ہوئی اے کہ ابنِ انسان کی غنہگاراں

نے حوالے کیتا جاسی، او اُسی سُولی اپر چاہڑسن، تے  
تریٹے دیہاڑے او فر زندہ ہوئی جاسی۔<sup>8</sup> اے گل سٹی

کرے اُنہاں جناٹیاں کی حضرت عیسیٰ نیاں گلاں یاد آیاں۔

9 فر او قبر تُوں مڑی کے آیاں، تے اُنہاں اے ساریاں گلاں  
 حضرت عیسیٰ نے یاراں صحابیاں تے ہور سارے لوکاں  
 کی دسیاں۔ 10 جیہڑیاں جناٹیاں اے گلاں حضرت  
 عیسیٰ نے صحابیاں کی دسیاں سن، اُنہاں وچ مگدلہ  
 شہر نی مریم بی بی، یوانہ بی بی تے حضرت یعقوب  
 نی ماں مریم بی بی شامل سن۔ اِنہاں نال کجھ ہور  
 جناٹیاں وی سن۔ 11 صحابیاں کی اُنہاں نی گل بے  
 معنی لغی، اِس واسطے اُنہاں کی یقین ناں آیا۔ 12 پر  
 حضرت پطرس اُٹھی کے قبرے در دوڑی گئے۔ اُتھے  
 جائی کے اُنہاں چھکی کے قبرے وچ تکیا، تے  
 اُتھے صرف کفن ہی سی۔ اے چیز تکی کے او بہوں  
 حیران ہوئے، تے اپنے گہرے در مڑی کے ٹری گئے۔

## حضرت عیسیٰ دواں پیروکاراں کی نظر اچھنے ان

13 اُسے دیہاڑے حضرت عیسیٰ نے دو پیروکار اُس گراں در  
 پئے جائے سن جس ناں اِماؤس سی۔ او گراں یروشلم شہر  
 تُوں تقریباً ست میل نے فاصلے اپر سی۔ 14 او اُس سارے

واقعے نے بارے وچ گلاں پئے کرنے جائے سن جیہڑا کہ  
 ہویا سی۔ <sup>15</sup> جیہڑے ویلے او اک دُوئے نال گلاں کرنے تے  
 بحث کرنے پئے سن تے اسرح ہویا کہ حضرت عیسیٰ آپوں  
 اُنہاں کول اچھی کے اُنہاں نال نال ٹرنا شروع ہوئی گئے۔  
<sup>16</sup> پر قدرتی طور پر اُنہاں نی اکھیاں پر ایئے جہیا پڑدا  
 اچھی گیا کہ او حضرت عیسیٰ کی ناں سیاٹی سکے۔  
<sup>17</sup> حضرت عیسیٰ اُنہاں کی آخیا، ”اے کے گل  
 اے، جیہڑی راہ وچ تساں اک دُوئے نال کرنے پئے  
 او؟“ او غمگین ہوئی کے اُتھے ہی کھلی گئے۔  
<sup>18</sup> اُنہاں وچوں اک پیروکار جس ناں گلیپاس سی حضرت  
 عیسیٰ کی جواب دتا، ”یروشلم شہر وچ توں واحد بندہ این  
 جسی پتہ نی کہ اِنہاں دیہاڑیاں وچ اُتھے کے کجھ ہویا؟“  
<sup>19</sup> حضرت عیسیٰ اُنہاں کولوں پُچھیا، ”کے ہویا؟“  
 اُنہاں جواب دتا، ”حضرت عیسیٰ نا واقعہ جیہڑا ناصرت  
 شہر نا سی۔ اللہ تعالیٰ تے سارے لوکاں نی نظراں وچ  
 اُس نے کم تے کلام بہوں قدرت آئے سن، او واقعی  
 بہوں بڑا نبی سی۔ <sup>20</sup> آساں نے بڑے مذہبی پیشواواں تے

بڑے بڈیریاں اُسی رومی حکومت نے حوالے کیتا تانکہ  
 اُسی سزائے موت دتی جائے۔ اسرح اُنہاں اُسی سُولی اُپر  
 چہڑوایا۔<sup>21</sup> اُساں کی اُمید سی کہ او بنی اسرائیلی قوم کی  
 آزاد کراسی۔ آج اس واقعے نا تریٹا دیہاڑا آے۔<sup>22</sup> پر ہور  
 گل اے اے کہ اُساں نیاں کُجھ جنائیاں سَویرے سَویرے  
 قبر اُپر گئیاں تے مڑی اچھی کرے اُساں کی حیران کری  
 شوڑیا۔<sup>23</sup> جنائیاں کی حضرت عیسیٰ نی میت اُتھے نی  
 لبھی۔ اُنہاں کہہاں اچھی کرے اے گل آخی کہ، ’اُساں  
 کی فرشتے نظر آئے تے اُنہاں آخیا کہ حضرت عیسیٰ  
 زندہ اٹ۔‘<sup>24</sup> اُساں نے ساتھیاں وچوں وی کُجھ قبر اُپر  
 گئے سٹ، تے جسرح جنائیاں آخیا سی اُنہاں وی او ہی  
 گل تکی، پر اُنہاں کی حضرت عیسیٰ نی لبھے۔ “  
<sup>25</sup> حضرت عیسیٰ اُنہاں کی آخیا، ”او بیوقوفو، تُساں  
 نبیاں نیاں ساریاں گلاں اُپر پوری طرح یقین نی او کرنے!  
<sup>26</sup> کیئاں تُساں کی پتہ نی کہ اللہ تعالیٰ نے پہیجے وے  
 مسیح کی اے سارے دُکھ سیہی کرے اللہ تعالیٰ نے حضور  
 اعلیٰ مرتبہ حاصل کرنا سی؟“<sup>27</sup> فر حضرت عیسیٰ اُنہاں

کی اپنئے متعلق او ساریاں گلاں سمجھایاں جیہڑیاں توراہ  
 شریف وچ تے صحائفُ الانبیاء وچ لِخیاں گئیاں سُن۔  
 28 اتنے وچ او سارے اُس گراں کول پہنچی گئے  
 جتھے او دو جائی رہے سُن۔ پر حضرت عیسیٰ نی  
 ٹور اپروں اِسرح لغٹا سی کہ اُنہاں کڈرے اگے جاٹا  
 آے۔ 29 پر اُنہاں حضرت عیسیٰ کی مجبور کری شوڑیا  
 تے آخیا، ”ہُن بھوں دیر ہوئی گئی آے، نماشاں ہوئے  
 آلیاں اُن۔ اَج تُساں ساڑے کول ہی رَہو۔“ اِس واسطے  
 او اُنہاں کول ٹھہرنے واسطے اُنہاں نال ٹری گئے۔  
 30 جیہڑے ویلے حضرت عیسیٰ اُنہاں نال روٹی کھائے  
 واسطے بیٹھے، تے روٹی کِہنی کے اللہ تعالیٰ نا شکر  
 ادا کیتا، فِر روٹی پہنی کے اُنہاں کی دتی۔ 31 اُس  
 ویلے اُنہاں نیاں اکھیاں کھلیاں، تے اُنہاں حضرت  
 عیسیٰ کی سیاٹی کِہندا۔ پر او اُنہاں نی نظراں کولوں  
 غائب ہوئی گئے۔ 32 فِر اُنہاں اِک دُوئے نال اِسرح  
 گلاں کیتیاں، ”واقعی جس ویلے راہ وچ حضرت

عِیسیٰ اَساں نال کلامِ پاک نیاں گلاں کرنے سُن، اُس  
 ویلے ساڑھے دِل کِتی جوش وِچ آئے وے سُن، نا؟“  
 33 او اُسے ویلے اُٹھی کے یروشلَم شہر دَر مُڑی کے تُری  
 گئے۔ اُتھے جائی کے اُنہاں تکیا کہ حضرت عِیسیٰ  
 نے یاراں صحابہ کرام باقی پیروکاراں سمیت جمع ہوئے  
 وے سُن۔ 34 اُتھے اے گلاں بوٹیاں پٹیاں سُن، ”واقعی  
 حضرت عِیسیٰ ڈوئی واری زندہ ہوئی گئے اُن! او شمعون  
 کی نظر وی آئے اُن!“ 35 اُنہاں نیاں گلاں سُنی کے  
 اِنہاں دواں وی راہ وِچ پیش اچھٹے آلا سارا واقعہ اُنہاں  
 کی دسیا تے اے گل وی دسی کہ روٹی پننے ویلے  
 کِسرح اُنہاں حضرت عِیسیٰ کی سیاٹی کہندا سی۔  
 36 او دوئے اے گلاں کرنے ہی پئے سُن کہ حضرت عِیسیٰ  
 آپوں اُنہاں ساریاں اپر ظاہر ہوئی گئے تے آخیا، ”تُساں اپر  
 سلامتی ہووے!“ 37 پر او سارے کہہرائی گئے تے ڈرے  
 نال اے سمجھے کہ کُسے رُوح کی تکٹے پئے اُن۔  
 38 حضرت عِیسیٰ اُنہاں کی آخیا، ”تُساں کیئاں کہہرائے  
 پئے او؟ تُساں نے دِلاں وِچ شک کیئاں اے؟“ 39 مہارے

ہتھاں تے پیراں کی تکو۔ اے میں ہی آن! مہاڑے نال ہتھ لائی کے تکی کہنو! رُوح نا گوشت تے ہڈی کُجھ وی نی ہونّا جسرح مہاڑا اے۔“<sup>40</sup> اے گل آخی کے حضرت عیسیٰ اُنہاں ساریاں کی اپٹے ہتھ تے پیر دسے۔<sup>41</sup> او اِس قدر خوش تے حیران سُن کہ اُنہاں کی یقین نی سی اچھٹا پیا۔ فر حضرت عیسیٰ اُنہاں کولوں پُچھیا، ”تُساں کول کھاٹے واسطے کُجھ اے وے؟“<sup>42</sup> اُنہاں پُہجی وی مچھی نا اِک ٹوٹا حضرت عیسیٰ کی دتا،<sup>43</sup> تے حضرت عیسیٰ اُسی کہنی کے ساریاں نے سامٹے کھادا۔<sup>44</sup> فر حضرت عیسیٰ اُنہاں کی آخیا، ”اے مہاڑیاں او گلاں اُنّ جیہڑیاں میں تُساں کی اُس ویلے آخیاں سُنّ جیہڑے ویلے میں تُساں نال ساں کہ جو کُجھ مہاڑے بارے وچ توراہ شریف، زبور شریف تے نبیاں نے صحیفیاں وچ لِخیا وا اے، او سارا لازمی پورا ہونّا سی۔“<sup>45</sup> فر حضرت عیسیٰ اُنہاں نے ذہن کھولی شوڑے تانکہ او کلامِ پاک نا مطلب سمجھی سکن۔<sup>46</sup> اُنہاں آخیا، ”کلامِ پاک وچ لِخیا وا اے کہ، ’اچھٹے آلے مسیح اپر دُکھ تے تکلیفاں اچھسُن

تے مرنے توں بعد تریئے دیہاڑے فرزندہ ہوئی جاسی۔<sup>47</sup> وی لِحیا وا اے کہ یروشلم شہر توں شروع کری کے ساری دُنیا وچ اُس نے ناں اپر اِس گل نی لازمی تبلیغ کیتی جائے کہ 'تُساں توبہ کرو، تے فر تُساں کی اپٹے غناہواں نی مُعافی لبھسی'۔<sup>48</sup> تُساں اِنہاں گلاں نے گواہ او۔<sup>49</sup> میں رُوح پاک تُساں اپر نازل کرساں جس نا وعدہ مہاڑے آسمانی باپ کیتا وا اے۔ پر جس ویلے تک تُساں کی اللہ تعالیٰ نی طرفوں قوّت ناں لبھی جائے، اِسے شہر وچ رہو۔“

## حضرت عیسیٰ نا عرشِ مُعلیٰ اپر جاٹا

<sup>50</sup> فر حضرت عیسیٰ اُنہاں کی بیتِ عیناہ گراں کول کھڑیا۔ اُتھے جائی کے حضرت عیسیٰ اپٹے ہتھ چائی کے اُنہاں واسطے برکت نی دُعا کیتی۔<sup>51</sup> فر اِسرح ہویا کہ برکت نی دُعا کرنیاں کرنیاں حضرت عیسیٰ کی آسماناں اپر کِہنی کھڑیا گیا۔<sup>52</sup> جیہڑے لوک اُتھے سٹ اُنہاں حضرت عیسیٰ کی سجدہ کیتا تے بے حد خوشی نے عالم وچ یروشلم شہر در مُڑی کے آئی گئے۔<sup>53</sup> او متواتر



---

بڑے عبادت خانے وچ ہی رہے، تے اللہ تعالیٰ نی حمد و  
ثنا بیان کرنے رہے۔

نور-ے-کشمیر



اللہ تعالیٰ اپنا فضل ترے امن پاک نبیاں نے ذریعے انسانیت پر ظاہر  
کیتا۔ اسان نا دلی مقصد اے کہ اس پیغام کی پھیلا یا جائے۔  
اسان خوشی نال عیسیٰ المسیح نے بارے وچ تسان نال گل  
کرساں، یا تسان نال دُعا کرساں، یا تسان نی مدد کرساں۔



<https://m.me/noor3kashmir> WhatsApp +447726104324 <https://noorekashmir.com>